

詞

綜

冊二

卷一

目錄

卷二

卷三

詞綜卷七

宋詞六十二首

賀鑄九首

毛滂二十首

王仲一首

杜安世三首

李元膺四首

孫洙一首

朱服一首

章棣一首

舒亶二首

李清臣一首

王詵二首

趙令時二首

王安禮一首

王安國二首

曾肇一首

晁冲之五首

秦觀一首

王觀五首

賀

鑄字方回衛州人孝惠皇后族孫元祐中通判泗州又倅太平州退居吳下自號慶湖

遺老有東山寓聲樂府三卷

張文潛云方回樂府妙絕一世盛麗如遊

金張之堂妖冶如攬嬙施之袿幽索如屈

宋悲壯如蘇李周少隱云方回有梅子

黃時雨之句人謂之賀梅子方回寡髮郭

功父指其髻謂曰此真賀梅子也陸務

觀云方回狀貌奇醜俗謂之賀鬼頭其詩

文皆高不獨工長短句也

珍做宋版印

薄倖

淡妝多態更滴滴頻迴盼睽便認得琴心先許欲縮
合歡雙帶記畫堂風月逢迎輕顰淺笑嬌無奈待翡翠屏開芙蓉帳掩羞把香羅暗解自過了燒燈都
不是踏青挑菜幾回憑雙燕丁寧深意往來却恨重
簾礙約何時再正春濃酒困人閑晝永無聊賴厭厭
睡起猶有花梢日在

青玉案

凌波不過橫塘路但目送芳塵去錦瑟年華誰與度
月臺花榭瑣窗朱戶惟有春知處碧雲冉冉蘅皋
暮綵筆新題斷腸句試問閑愁都幾許一川烟草滿
城風絮梅子黃時雨中吳紀聞云鑄有小築在姑蘇
盤門之內十餘里地名橫塘方回往來其間作此詞
後山谷有詩云解道江南腸斷句只今惟有賀方回
其爲前輩推重如此潘子真云寇萊公詩杜鵑啼
處血成花梅子黃時雨如霧世推方回所作梅子黃
時雨爲絕唱蓋用萊公語也

柳色黃

薄雨催寒斜照弄晴春意空闊長亭柳色纔黃遠客

一枝先折烟橫水際映帶幾點歸鴉東風消盡龍沙
雪還記出門時一作關來恰而今時節將發畫樓
芳酒紅淚清歌頓一作便成輕別已是經年杳杳音
塵都絕欲知方寸共有幾許清愁芭蕉不展丁香結
枉望斷天涯兩厭厭風月能改齋漫錄方回眷一姝
別久姝寄詩云獨倚危欄淚滿襟小園春色懶追尋
深恩縱似丁香結難展芭蕉一寸心賀因所寄詩遂
成此調

清平樂

小桃初謝雙燕還來也記得年時寒食下紫陌青門
遊冶楚城滿目春華可堪遊子思家惟有夜來歸
夢不知身在天涯

望湘人

厭鶯聲到枕花氣動簾醉魂愁夢相半被惜餘熏帶
驚剩眼幾許傷春春晚淚竹痕鮮佩蘭香老湘天濃
暖記小江風月佳時屢約非烟游伴須信鸞絃易
斷奈雲和再鼓曲終人遠認羅襪無蹤舊處弄波清
淺青翰棹艤白蘋洲畔儘目臨臯飛觀不解寄一字
相思幸有歸來雙燕

踏莎行

詞

綜卷七

一二中華書局聚

急雨收春斜風約水浮紅漲綠魚文起年年遊子惜
餘春春歸不解招遊子 留恨城隅關情紙尾闌干

長對西曠倚鴛鴦俱是白頭時江南渭北三千里

憶秦娥

曉朦朧前溪百鳥啼匆匆啼匆匆凌波人去拜月樓
空 舊年今日東門東鮮妝輝映桃花紅桃花紅吹
開吹落一任東風

又桑

著春衫玉鞭鞭馬南城南南城南柔桑細草留住金
銜 粉蛾采葉供親蠶蠶饑略許攜纖纖攜纖纖前
裙淇上更待初二

感皇恩

蘭芷滿汀洲游絲橫路羅襪塵生步迴顧整鬟顰黛
脉脉多情難訴細風吹柳絮人南渡 回首舊游山
無重數花底深朱戶何處半黃梅子向晚一簾疎雨
斷魂分付與春歸去

毛

滂字澤民江山人爲杭州法曹以樂府受知

蘇軾得名嘗知武康縣又知秀州有東堂

詞二卷

浣溪沙 泛舟還餘英館

烟柳風蒲冉冉斜小窗不用著簾遮載將山影轉灣沙
略約斷時分岸色蜻蜓立處過汀花此情此水共天涯

又寒食初晴東堂對酒

小雨初收蜨做團和風輕拂燕泥乾秋千院落落花寒
莫對清尊追往事更催新火續餘歡一春心緒倚闌干

又汎舟

銀字笙簫小小童梁州吹過柳橋風阿誰勸我玉杯空
小醉徑須眠錦瑟夜歸不用照紗籠畫船簾卷月明中

惜分飛

淚溼闌干花著露愁到眉峯碧聚此恨平分取更無
言語空相覷斷雨殘雲無意緒寂寞朝朝暮暮今夜山深處
斷魂分付潮回去陳質齋云澤民他辭雖工未有能及此者
周輝云語盡而意不盡意盡而情不盡

踏莎行 早春卽事

堦影紅遲柳苞黃遍纖雲弄日陰晴半重簾不卷篆
香橫小花初破春叢淺鳳繡猶重鴨爐長暖屏山

翠入江南遠醉輕夢短枕閑欹綠窗窈窕風光轉

蝶戀花寒食

紅杏梢頭寒食雨燕子泥香不住飛來去行傍柳陰
聞好語鶯兒穿過黃金縷桑落酒寒杯懶舉總被
多情做得無情緒春過二分能幾許銀臺新火重簾
暮

驀山溪楊花

雪堂氈徑撲撲飛絮柔弱不勝春任東風吹來吹
去牆陰花外一半落誰家葉依依烟鬱鬱依舊如張
緒那人拈得吹向釵頭住不定却飛揚滿眼前攪
人情慄蜂兒蜨子教得越輕狂隔斜陽點芳草斷送
青春暮

燭影搖紅松窗午夢初覺

一畝清陰半天小雨松窗午牀頭秋色小屏山碧帳
垂烟縷枕畔風搖綠戶喚人醒不教夢去可憐恰
到瘦石寒泉冷雲生處

粉蝶兒

雪徧梅花素光都共奇絕到窗前認君時節下重幃
香篆冷蘭膏明滅夢悠揚空遶斷雲殘月沈郎帶
寬同心放開重結褪羅衣楚腰一捻正春風新著摸

花花葉葉粉蝶兒這回共花同活

最高樓

微雨過深院菱荷中香冉冉繡重重玉人共倚闌干
角月華猶在小池東入人懷吹鬢影可憐風 分散
去輕如雲與葉剩下了許多風與月侵枕簟冷簾櫳
剛能小睡還驚覺略成輕醉早惺忪仗行雲將此恨
到眉峯

玉樓春 盱眙作

長安回首空雲霧春夢覺來無覓處冷烟寒雨又黃
昏數盡一堤楊柳樹 楚山照眼青無數淮口潮生
催曉渡西風吹面立蒼茫欲寄此情無鴈去

青玉案

芙蓉花上濛濛雨又冷落池塘暮何處風來搖碧戶
捲簾凝望淡烟疎柳翡翠穿花去 玉京人去無由
駐忍獨在凭欄處試問綠窗秋到否可人今夜新涼
一枕無計相分付

七娘子 舟中早秋

山屏霧帳玲瓏碧更綺窗臨水新涼入雨短烟長柳
橋蕭瑟這番一日涼一日 離多綠鬢年時白這離
情不似而今惜雲外長安斜暉脉脉西風吹夢來無

跡

西江月

烟雨半藏楊柳風光初著桃花玉人細細酌流霞醉裏將春留下 柳外鴛鴦作伴花邊蝴蝶爲家醉翁醉也且由他月在柳橋花榭

夜行船餘英溪

弄水餘英溪畔綺羅香日遲風慢桃花春浸一篙深畫橋東柳低烟遠 漲綠流紅空滿眼倚蘭橈舊愁無限莫把鴛鴦驚飛去要歌時少低檀板

憶秦娥春夜松軒

夜夜夜了花朝也連忙指點銀瓶索酒嘗 明朝花落知多少莫把殘紅埽愁人一片花飛減却春

散餘霞

牆頭花口寒猶噤放繡簾晝靜簾外時有蜂兒趁楊花不定 闌干又還獨凭念翠低眉暈春夢枉惱人腸更厭厭酒病

調笑盼盼

無力倚瑤瑟罷舞霓裳今幾日樓空雨小春寒逼鈿暈羅衫烟色簾前歸燕看人立却趁落花飛入

又鶯鶯

何處長安路不記牆東花拂樹瑤琴理罷霓裳譜依
舊月窗風戶薄情年少如飛絮夢逐玉環西去

又茗子

芳草恨春老自是尋春來不早落花風起紅多少記
得一枝春小綠陰青子空相惱此恨平生懷抱

感皇恩 鎮江待聞

綠水小河亭朱欄碧甃江月娟娟上高柳畫樓縹緲
盡挂窗紗簾繡月明知我意來相就銀字吹笙金
貂取酒小小微風弄襟袖寶熏濃炷人共博山烟瘦
露涼釵燕冷更深後

王

仲字與善吳虎臣云元祐間人

燭影搖紅

烟雨江城望中綠暗花枝少惜春長待醉東風却恨
春歸早縱有幽歡會巧奈如今風情漸老鳳樓何
處畫欄愁倚天涯芳草

杜安世

字壽域京兆人有詞一卷

折紅梅

喜輕澌初綻微和漸入郊原時節春消息夜來陡覺
紅梅數枝爭發玉溪仙館不似箇尋常標格化工別
與一種風情似勻點胭脂染成香雪重吟細閱比

繁杏夭桃品流終別只愁共綵雲易散冷落謝池風
月憑誰向說三弄處龍吟休咽大家留取時倚闌干
聞有花堪折勸君須折

鶴冲天

清明天氣永日愁如醉臺榭綠陰濃薰風細燕子巢
方就盆池小新荷蔽恰是逍遙際單夾衣裳半籠軟
玉肌體石榴美豔一撮紅綃比窗外數脩篁寒相
倚有箇關心處難相見空凝睇行坐深閨裏懶更妝
梳自知新來憔悴

卜算子

樽前一曲歌歌裏千重意纔欲歌時淚已流恨更多
於淚試問緣何事不語渾如醉我亦情多不忍聞
怕和我成憔悴

李元膺南京教官

洞仙歌

雪雲散盡放曉晴庭院楊柳於人便青眼更風流多
處一點梅心相映遠約略顰輕笑淺一年春好處
不在濃芳小艷疎香最嬌軟到清明時候百紫千紅
花正亂已失春風一半早占取韶光共追游但莫管
春寒醉紅自暖

又雨

廉纖細雨帶東風如困縈斷千絲爲誰恨向楚宮一
夢多少悲涼無處問愁到而今未盡分明都是淚
泣柳沾花長與騷人伴孤悶記當年得意處酒力方
酣怯輕寒玉爐香潤又豈識情懷苦難禁對點滴簷
聲夜寒燈暈

茶瓶兒悼亡

去年相逢深院宇海棠下曾歌金縷歌罷花如雨翠
羅衫上點點紅無數今歲重尋攜手處空物是人
非春暮回首青門路亂英飛絮相逐東風去

思佳客

寂寞秋千兩畫旗日長花影轉階遲燕驚午夢迴遮
語蜨困春遊落拓飛思往事入顰眉柳梢陰重又
當時薄情風絮難拘束吹過東牆不肯歸

孫

洙字巨源廣陵人舉進士元豐中官翰林學

士

菩薩蠻記恨

樓頭尚有三通鼓何須抵死催人去上馬苦匆匆琵琶曲未終
回頭凝望處那更廉纖雨謾道玉爲堂玉堂今夜長黃叔暘云孫公於元豐間爲翰林學士

端愿太尉往來尤數會一日鎖院宣召者至其家則
出數十輩蹤跡得之于李氏時李新納妾能琵琶公
飲不肯去而迫于宣命入院幾二鼓矣遂草三制罷
復作此長短句以記別恨遲明遣以示李

朱

服

字行中烏程人熙甯中進士甲科累官國
子司業起居舍人以直龍圖閣知潤州徙
泉婺甯廬壽五州紹聖初召爲中書舍人
歷禮部侍郎坐與蘇軾游貶海州團練副
使蘄州安置改興國軍卒

漁家傲

東陽郡齋作

小雨纖纖風細細萬家楊柳青烟裏戀樹濕花飛不
起愁無際和春付與東流水九十光陰能有幾金
龜解盡留無計寄語東陽沽酒市攘一醉而今樂事
他年淚

章

棄

字質夫浦城人以蔭爲孟州司戶參軍試

禮部第一以平夏州功累擢樞密直學士
龍圖閣端明殿學士拜同知樞密院事卒
贈右銀青光祿大夫謚莊簡揮麈錄作莊
敏

水龍吟柳花

燕忙鶯懶芳殘正堤上柳花飄墜輕飛亂舞點畫青
林全無才思閑趁游絲靜臨深院日長門閉傍珠簾
散漫垂垂欲下依前被風扶起蘭帳玉人睡覺怪
春衣雪沾瓊綴繡牀漸滿香球無數才圓却碎時見
蜂兒仰粘輕粉魚吞池水望章臺路杳金鞍游蕩有
盈盈淚黃叔暘云傍珠簾數語形容盡矣

舒

亶字信道慈谿人試禮部第一累官御史丞
以罪斥終直龍圖閣待制卒贈直學士

菩薩蠻

畫船撾鼓催君去高樓把酒留君住去住若爲情江
頭潮欲平江潮容易得却是人南北今日此尊空
知君何日同黃叔暘云此詞極有味

散天花

雲斷長空落葉秋寒江烟浪盡月隨舟西風偏解送
離愁聲聲南去鴈下汀洲無奈多情去復留驪歌
齊唱罷淚爭流悠悠別恨幾時休不堪殘酒醒凭危
樓

李清臣

字邦直魏人舉進士歷官知制誥翰林學
士遷尚書左丞罷爲資政殿學尋拜中書
侍郎以大學士知河南府徽宗初立入爲

門下侍郎出知大名府卒贈金紫光祿大夫

謁金門

楊花落燕子橫穿朱閣苦恨春醪如水薄閑愁無處著
綠野帶紅山落角桃杏參差殘萼歷歷危檣沙外泊東風晚來惡

王

詵字晉卿太原人徙開封尚英宗女魏國大

長公主歷官定州觀察使開國公駙馬都尉贈昭化軍節度使謚榮安

黃魯直云晉卿樂府清麗幽遠工在江南諸賢季孟之間

憶故人

燭影搖紅向夜闌乍酒醒心情懶尊前誰爲唱陽關
離恨天涯遠無奈雲沉雨散凭闌干東風淚眼海棠開後燕子來時黃昏庭院能改齋漫錄都尉憶故人作徽宗喜其詞意猶以不豐容宛轉爲憾遂令大晟府別撰腔周美成增益其詞而以首句爲名謂之燭影搖紅云按原詞甚佳美成增益真所謂續鳧爲鶴也

撼庭竹

綽略青梅弄春色真艷態堪惜經年費盡東君力有
情先到探春客無語泣寒香時暗度瑤席月下風
前空悵望思攜手同摘畫欄倚遍無消息佳辰樂事
再難得還是夕陽天空暮雲凝碧

趙令時

字德麟燕懿王玄孫元祐中簽書穎州公

事歷右朝請大夫改右監門衛大將軍營
州防禦使遷洪州觀察使襲封安定郡王
尋遷寧遠軍承宣使同知行在大宗正事
贈開府儀同三司有聊復集

蝶戀花

欲減羅衣寒未去不卷珠簾人在深深處殘杏枝頭
花幾許啼紅止恨清明雨盡日水沉香一縷宿酒
醒遲惱破春情緒飛燕又將歸信誤小屏風上西江
路

烏夜啼

樓上縈簾弱絮牆頭礙月低花年年春事關心事腸
斷欲棲鴉舞鏡鸞衾翠減啼珠鳳蠟紅斜重門不
鎖相思夢依舊一作隨意繞天涯

王安禮字和甫安石弟累官尚書左丞

點絳脣